

ADDITAMENTVM DISSERTATIONIS  
PRAECEDENTIS ,  
DE CORPORVM PLANO IMPOSITORVM DESCENSU :

AVCTORE  
G. W. Krafft.

§. I.

Vt haec Theoria conuolutionis corporum super plano inclinato rectius intelligatur, et vltius luce perfundatur sua: operae praetium omnino erit ad haec sequentia attendere, quorum mentio in praecedentibus aut plane nulla, aut minus distincta, facta est. Primo omni cura discernenda est Rotatio, corporis alicuius descendentis in plano inclinato, *Continua*, ab illa, quam *Inchoatam* tantum dico. Illa adest, si durante toto corporis descensu semper diuersa puncta corporis cum plano congruunt; adeoque obtinet, et corpus vertit, quamdiu hoc descendit: haec vero datur, cum corpus in primo motus sui initio rotatorium motum inchoat quidem, at continuare eum nequit, ob impedimentum aliquod obortum, vnde accidit, vt corpus tale prolabatur tantum, et reliquum postea viae motu rectorio absoluat; quae posterior Rotatio inchoata *Simplex procidentia* corporis vocari potest. Veluti si ex. gr. plano inclinato ABD semicirculus FLH situ valde obliquo insistat, vt ex centro grauitatis C perpendicularis CE, demissa in planum DB, cadat extra F versus B; patet ex dissertationis meae praecedentis §. 8. futurum esse, vt semicirculus  
ita

Tab. I.  
Fig. 3.